

春融堂集

春融堂集卷一

青浦 王昶 德甫

琴德居集

丁卯己巳

戊辰

邢女廟

風卷靈旗半掩門
時聞報賽鷓鴣豚
不知銀杏雙株下
堆奠

雲芳烈女魂

明烈女楊雲芳墓在澗山後

茜墩訪顧寧人先生故居

寒颿卷平原落葉走長陌
誰知叢灌中舊有名儒宅
抽思跋賢關發憤窮聖籍
六藝廣研覃羣言綜繁蹟
尚友在詩書論交類草澤
頗羞子雲居欲侶田橫客
志不忘刀繩情豈慕旌帛
燕秦適莽蒼嵩華徧行役
終焉需於泥洵矣介如石
惟此一畝宮曾聞展函席
梁父空謠吟平陵痛屯昆
衡茅迹已荒

著撰人爭惜雞豚曉日紅
鳬鴈滄江碧再拜向遺墟
仰止何由釋

過崧宅塘

吳天橫斷靄漁火遠江生
杳杳蒹葭岸時聞欸乃聲
孤邨連雨暗野戍入雲平
忽憶宗城令高風萬古情

唐顧諫拜貝州宗城令華官隱

南翔問李長蘅檀園荒廢已久

薄霽收殘雨輕雷送晚陰
層樓多傷水小市半依林
夜火官橋靜人煙古巷深
檀園遺址盡悵望一沾襟

春申君廟

楚相勲名盛吳墟廟祀存
笙簫春社靜風雨古牆昏
崇道知荀況遺謀失李園
三千珠履客誰解報深恩

臨頓里

曉日魚蝦市遺墟鴈鷺田松筠成小築水石足清緣軼事襄陽傳叢書笠澤編獨嗟皮逸少故宅有誰傳

伍相里

神座當殘照靈衣覆古苔竟成破楚志空擅伯吳才問渡情猶在投江事可哀扁舟輸少伯浩蕩五湖回

何隱君別墅

虎阜畱初地橫山得故居古松低覆屋流水曲通渠掩徑苔紋石臨牕貝葉書安能攜坐具來此闢精廬

宿中峯庵

杖策尋山徑焚香宿化城空齋人語歇遙夜佛燈明願息塵中駕相於物外情況逢支許侶端坐學無生

過蔣編修西原先生

恭裴

小飲時李編修玉舟

重華

在坐

握衣奉席仰前修畱客花閒共勸酬
三館詞章歸載筆五湖雲月付拏舟
著書自欲齊中壘名德人知重太邱
笠澤蘇臺成二老往來筇屐最風流

泊西神寺山麓

小舫維沙岸精寮近水隈
帘垂風外柳碑蝕雨中苔
幽鳥臨谿語疏花夾澗開
雲堂清梵寂坐聽放參回

五牧

莽莽寒蕪路驚心戰伐年
成仁悲尹玉行法失張全
掬指殘軍痛招魂故相憐
傳聞千載後青燐尙淒然

贈吳教諭企晉

泰來

玉樹遙思久瓊枝結契初風華江左習詞賦茂陵書譽已經
平子

企晉極爲李
布衣果稱許

人真似幼興祇堪山澤裏鸞鶴伴幽居

秦淮水榭

玉鑪香燼漏聲稀漸覺輕寒到葛衣涼露娟娟楓欲下潏江
綠綠鴈初飛好聽北里新歌起莫問南朝舊事非回憶五湖
秋色遠白蘋花發徧苔磯

卞忠貞公墓

歷陽營鼓聲登登犢牛六足恣奔騰大馬小馬童諺作尙書
謀國憂填膺永昌何爲乏遠計司農下詔徵常侍不能廷尉
望山頭寧知狼子終難制東陵渡口兵倉黃烽火夜照臺城
旁背瘡未合力戰死二子策馬相從亾忠臣孝子眞無兩況
有宏誦爲陳狀出走空悲劉大連俘囚卻笑刁元亮當時賜

祭贈葬錢經營廟貌畱千年侍郎都尉各拱侍靈旗玉座紛
巍然嗚呼人臣要在能報國士行坐視終何益地下擎拳透
爪時應知獨望江州櫟

方正學祠

亭空木末倚江邊祠外寒濤怒蹴天南去冠裳隨玉步北來
烽火恨金川學宗吳柳文章古名竝齊黃節義全恰與侍中
遺廟近雲車相遇一悽然

雨後登燕子磯

勞人積羈心矧茲值秋晏駕言從遠游征屨事怡衍朝辭建
康城聿來肆游眴援蘿躡危磯捫葛躋絕巘密霧隱前汀屯
雲聚高岸大江向東來煙水互涵演傾崖樓潛虬層阿起宿
鴈九派水此歸三楚地所限升喬悟超越憑虛駭汗漫心賞

寧有渝情愜得所願感時奏長謠庶免盈襟歎

江上

寒鴈下蕪城暮靄生遙颺蕭蕭楓葉疏漠漠蘋花晚雲颿煙
際收江笛風中斷何處最相思殘鐘楚天遠

京口晚泊

明月生江上天寒萬籟清依依聞遠笛渺渺度深更客舫參
差泊漁歌次第生謝郎千里思茲夕倍關情

倪雲林故居

問訊蕭閒館疏林起暮颺晴嵐當畫閣碧樹隱平池詩卷俞
和寫風流饒介知飛花浮茗處憑弔起相思

梁谿舟次

水國斜陽晚停橈古渡前白蘋殘暮雨紅葉滿清泉遠火明

山寺寒鐘入夜船愁聽雲外鴈嘹唳度長天

封谿曉泊

一夜荻蒲雨鱗谿秋水生臥聞榜人語煙際釣船橫蘋葉曉
微墜野禽時獨鳴稍看叢竹外初日數峯晴

泊青陽

風竹晚蕭蕭云是青陽路籬落綠雲中沿谿見漁步茲來秋
已殘紅葉散津渡荒墟颺颺遠渚亂鷗鷺不逢絕世人何
從展幽懷微吟感遇詩彌廬間居賦明晨楚誦亭行滕縛雙
屨玉局表高懷悠然啓遐慕

罷畫谿

谿山宛如畫誰信畫不如含翠峯窈窕殷紅樹扶疏澹旭偶
明滅微雲互卷舒絕景詎能狀心賞與之俱微寒霜未降妍

暖同春初我時駕扁舟弭櫂依篠簃香杭林下飯臺笠煙中
漁母乃隱君子耦耕希溺沮屬時歲將晏孤征情豈遽忽增
世外想清磬來精廬

西沈

未游善卷洞先沈長蕩湖荻湖稱西沈寒淅瀟清虛涼颯晚
不起明鏡開奩初迢迢蘋荇亂漠漠颿檣舒北流接梁谿西
路通具區疏陰桑柘外竹屋樓秋漁微霜昨夜降楓葉明邨
墟斜陽澹暮靄遠見征鴻書雲山洵幽絕逸抱何時攜簪攜
雪中權來卜水榭居

國山碑

我從洞汭來山水倍蔥蒨煙巒遠迤邐葭葦互凌亂罨畫已
幽深銅官復蜿蜒或言國山陰石圖尚可辨踰嶺一摩挲斑

駁麗苔蘚其圍度丈餘刻畫稍漫漶其行四十三其字徑二寸造自天璽年歲陽尚可按時皓頗驕盈羣臣乃逸諺甘露霏林巒瑞星爛霄漢赤文比金符綠字擬錦段下至物類繁奏上恣欺謾一千二百餘巧歷誰能算司徒與太常持節莅封禪自謂功德隆三五欲同貫南蠻已交攻西晉正強悍阿童駕樓船木梯徧江岸薛瑩先乞降張悌復死戰倉黃輿櫬時奉書詞悽惋回憶初平初英雄起江甸父子騁奇材兄弟亦交贊畧地劉繇奔用火曹瞞竄遂定業三分鼎峙河山奠四傳逮彭祖生民日塗炭乃知幸賴祥實以兆禍患碑辭豈足憑先機失吾彥嗟嗟板蕩時臣工擅詞翰挾藻仿典墳結體沿隸篆蘇建與華覈才名高東觀當竝敦彝傳豈同耳目翫行將闢荆榛響拓極神變第恐六丁收蛟螭激雷電

訪任公釣臺

昔誦南華經投竿向東海樂安非其倫巨犢意何在騎兵忽
升庸俯首備朝采一麾出守時託興轉瀟灑頗聞決事餘蹤
迹雜樵採煙波寄風標詞藻散霞采從游有茂公相於擷蘭
茝校書性所敦食麥貧無悔冉冉高臺傾渺渺清流滙一詠
絕交篇含悽亘千載

溧陽道中懷李布衣客山

果

夜寒宿葭葦清曉聞羣音涼風吹雨過衆嶺激微陰殘葉墮
秋水棲鳥鳴孤岑眷言同心友離居思難任想見衣薜荔讀
書松桂林躬耕諸古處高臥辭塵襟素侶時復遇鳴此風中
琴興發流水引還爲滄浪吟應知念行役悵然嗟滯淫

楓隱寺宿

斜照下秋淵蒼然闌鬪空人來疏竹外犬吠暮雲中落葉亂
無數寒泉響不窮幸隨蓮社客清話一宵同

蓮湖夜泊

日暮北風寒落颿向南浦薄霽空山來蒼然散平楚野徑極
清曠稍見漁樵侶竹樹翳遠墟煙火起別墅時聞雲外鐘禪
林信何所秋江生層波杳杳征鴻語夜久鐙遂昏孤篷滴微
雨

晚渡瀟湖

雲水渺無際楚天聞斷鴻煙中辨漁唱杳杳清谿東細雨亂
蒲響危橋曲渚通澹湖颿落後孤驛夜鐙紅

吳門寒夜

已過鳴雞埭重游走鹿場江山經楚甸風雪灑吳裝作客當

殘歲還家尙異鄉故人一尊酒相對慰愁腸
客路棲遲久高堂問訊疏誰人供負米有夢憶牽裾歲晚猶
催織天寒尙倚閭回看慈母線涕淚滴方諸

歸家得邵玉堯信

小船昨夜返邨居蛛網蝸涎自掃除龜手誰人知買藥蠅頭
獨自愛鈔書薄寒小酌三升酒晚食先挑半畝蔬猶喜故人
能記憶已從圓泖寄雙魚

移居八首

移宅清谿畔閒居得地偏階緣沙石甃門藉竹籬編窄徑通
瓜圃低窗傍藥田蓬蒿吾已足偃仰度殘年
五畝開樵路三閒闢草廬東西陸氏宅南北阮家居竹裏尋
花屐梅閒采藥鋤便隨藥若去未惜世緣疏

別港鄰花嶼回汀抱柳橋菱荷秋瑟瑟梧竹雨蕭蕭捕蟹畱
寒火叉魚候蚤潮此中生計得隨分老漁樵

卷幔開疏箔移牀近短檠研分蛾黛綠墨漬麝煤青殘碣來
禽帖叢書相鶴經芸蟬堪永日門巷畫長局

水檻閒憑處江樓悵望時漁家煙際籊酒市雨中旗短柵沿
谿曲孤颿隔浦遲高眠方跂腳落葉又催詩

菜自園丁送薪從野客分封泥培橘友曬藥驗桐君盤飮霜
前栗羹調雪底芹更知下溪熟安穩臥谿雲

獨處懷招隱幽棲藉解嘲宗雷蓮社侶嵇阮竹林交荷蓀尋
魚簑扶藜數鶴巢清言同散髮款款坐林坳

暮靄生樵徑斜陽下釣灘雲生長泖澗木落四峯寒鄰織燈
前急邨春月下看西郊行藥返露滿菊花團

西齋雨夜懷凌秀才祖錫

應曾

黯黯窗下鐙沈沈雨中漏松篁互蕭森稍辨滴簷溜幽念集
清宵遙情屬故舊眷我離居人晤言阻林岫夜半鴈聲寒想
見吟詩瘦

春陰

冥冥薄靄興漠漠寒霏積叢篠翳春陰殘梅泣清滴幽悰夙
無豫矧茲感離遯微波江路遙佳期杳難卽孤館澹餘香獨
聽林閒笛

游虞山同家碩夫

大椿

蘇顯之

去疾

兩秀才作

人世寡諧心尋幽協激慮方舟泝尚湖言訪海隅路屬值春
夏交曾颺扇和煦蔥蒨滋陵茗敷榮榮邱樹始經巫咸祠繼
造言子墓海色橫空濛湖光藹回互凌緬塗旣紆登頓徑屢

誤悠悠元雲興微微零雨注攬景得大觀撫化足鳴豫逝矣
攜朋曹懷哉遂幽素

破山寺夜宿止公山房

雲松何窈窕勝地恆招尋人語落花徑鳥曉修竹林斜陽生
暝色寒澗瀉清音獨往空山裏幽懷慕向禽
花竹森樵徑雲山秀梵宮永懷僊尉句吟望思無窮清磬疏
林外禪鐙暮靄中夜寒涼露滴解帶聽松風

拂水山莊

烏目山頭夕照餘舊時臺榭已成墟南朝江令荒遺宅西蜀
揚雄認故居紅豆花殘悲往劫絳雲樓燼失藏書薜蘿舊事
何從問月照香嬰對綺疏

過陳見復先生祖范園居

數畝邱園裏蕭然古意存夕陽明遠岫流水抱衡門棲隱名
偏重譚經道自尊東臯耆舊在來往共琴樽

爲家碩夫題畫卽效其體

至人寂滅悟幻境山河大地皆虛無妙明心地一涌見華嚴
彈指知非誣吾觀畫理亦如是豈有刻畫煩規模閒窗無人
氣蕭爽忽對藤牋發深想蘸墨旋看煙靄生揮毫已覺楓杉
響山前茅屋幽且閒絲笳萬个遮柴關寒陂古柵人不到但
有碎玉鳴潺湲居家烏目山閒住灌莽荒叢不知數窈窕危
峯半入雲圖中彷彿前游處聞君臥病愁塵勞茶煙藥裏耽
蕭寥曷不東歸破龍淵便攜坐具依松寮三峯遺指況未沫
相期參叩忘昏朝他時乾慧滅見性一笑此卷如秋毫

訪李客山

曲巷荆扉草一叢
檐牙初日照簾櫳
廚開賸有春釵綠
電滅曾無宿火紅
品到清寒方足貴
文歸澹雅自然工
當門乞得蒙山茗
讀畫譚詩興不窮

滕氏家祠

宋水部員外郎滕茂實字秀穎臨安人靖

康初以工部員外郎使金馬所畱欽宗及

郊茂實迎謁號泣金人諭以大用迫令易服茂實力

拒之請從舊主北行金人不許憂憤成疾卒雲中其

友人董誥援歸言于張浚上其事贈龍圖閣學士官其家三人

仗義三吳重孤忠
萬古靈衣冠瞻舊德
俎豆仰前型月窟初
微夢雲亭蚤問經
訐謨威敵國議論動
朝廷伉直心原壯艱
危運獨丁金符天子
命玉節使臣星生死
黃旂慟身名碧篆
銘英風昭日月壯烈
震雷霆異地叢祠盛
空山古墓局殊勳
標史冊遺像肅門庭
念遠音徽著懷先涕
淚零炳麟河岳氣
長與照丹青

韓蘄王廟

空堂神鬼半青紅，飄颻雲旗鬪朔風。
五國君臣終陷沒，一家婦女盡英雄。
廟中墜馬仇難復，湖上騎驢恨未窮。
聞說鐵山碑十丈，幾時別薛讀元功。

墓在靈巖山下，有趙雄碑甚高。

題徐秀才薈林

薈坡

水亭

憐君頻失路，歸種傍湖田。
濯足清谿去，蘆中聞扣舷。
菰蒲鳴夜雨，鷗鷺散江煙。
秋水南華意，誰人得共傳。

號國夫人蚤朝圖爲張丈擔伯

錫爵

題

月落未落光，朦朧露花煙。
柳天空濛阿姆侍，監紛左右沙隄。
前後紅鐙紅赤絲，結尾連錢驄。
玉鞭斜轉回銀轡，內府奚官好身手。
控御蹴踏隨春風，八姨馬上意態濃。
羅衣珠壓俱瓏璵，蚤朝直入華清宮。
宮中深宵事歡宴，那復問夜勤銅龍韞。

休已老九齡謫無人抗疏開皇衷銀闕欲啟鳴清鐘五家朱
轂爭追從雄狐一時尤獨出賜錢百萬誇豪雄曲江江頭驪
山上琲璣瑟瑟隨行蹤寧知軋犖來關中長安樓殿旋成空
倉皇聞難走馬去馬鬼遺恨將毋同丹青千載淚痕在對此
太息陳倉東

蘇文忠公赤壁圖

大江日夜流洪濛蒲圻魚嶽爭龍從齊安赤鼻更秀絕晴天
削出青芙蓉蘇子召客晚置酒扁舟一葉凌長空涼風修修
白露下極目寒鏡明雲峯爛銀盤涌大海底激碧下照馮夷
宮坐中洞簫聲幽咽餘音驚起深淵龍西望武昌東夏口三
分形勢蟠心胷忽憶孫曹限南北水師百萬驅艨艟旌旗蔽
空號令肅笑指烏鵲真豪雄誰知夜半風信便周郎列炬千

山紅霸圖勝負長已矣千秋圓月懸青銅撫時感事輒太息
舉杯論古情無窮誰圖此景在卷軸羽衣鶴氅何雍容場來
兩賦照霄漢常與勝踐留遺蹤騎箕去後五百載何人繼起
追高風應知魂魄定戀此翩然披髮隨星虹捲圖還君一俯
仰夢駕孤鶴橫江東

題沈徵君冠雲

形登岱圖

縹緲煙霞一望收振衣長嘯倚高秋雲開碧海三更日地接
黃河九曲流漢碣秦碑傳勝蹟金泥玉檢照神州何時策杖
從君去談蕩天門賦遠游

題趙秀才升之

文哲

春感詩後

試鐙風定雨如絲寂寞西窗漏板遲不分茶煙禪榻昨夜深
吟徧斷腸詞

三年舊事不勝情
香燭鐙昏百感生
料得小樓人獨倚
杏花如雨撲簾旌

至吟嘯堂

輕颿斜挂綠楊絲
一笑猶嫌攬袂遲
去日蘼蕪方被徑
歸來菡萏已盈池
秋當七夕穿針節
人到三星在戶時
聞說冶春吟興好
先攜團扇索新詞

臥病

短枕橫繩牀空齋此臥疾
鐙落夢回時
蕭蕭秋雨滴
紙窗響枯葉
幽鳥時一鳴
閒門人不到
綠蘚被階生

題余布衣蕭客

仲霖

秋鐙夜讀圖

曉起開嚴廳
六花響簾押
平頭衝雪來
打門送畫匣
開函展長圖
松篁互蕭蕭
山砌沿苔衣
疏櫺翳梧葉
中有誰識人蕭

然脫巾帔仰眺明河長俛視零露浥夜深秋氣涼青鐙埋故
業蠹簡雜繩牀笙墳敗藤笈汲古思窳窳搜奇恥涉獵泯默
千載心欲與前賢接對茲益感喟儒術久晦暫私記已低離
俗學更紉縑儒宗有惠施謂惠徵君定字棟六藝恣該洽議禮定廟
郊學易辨掛搢高論泝義軒羣言陋鄒夾一笑唐宋來爭排
但諭誚君能從之游師承未云乏定得禮堂傳差令小儒懾
趙商訊風詩張逸問禘祫紹述期無謾昕夕攷遺法嗟我本
樛昧蚤爲世網脅破屋圓泚濱遺書頗滿篋舊學愧疏蕪羈
游益疲茶幸逢賓館閒相於偕步屣深知慕前修素心良已
愜呵凍爲此詞飛騰動臂胛

贈許丈子遜

廷鑑

元亮久知歸栗里天隨近喜住松陵白頭尙任鳳騷重青眼

相看意氣增，卻病文先傳。七發鬪強酒，立盡三升賞。音梅會
人雖逝，少爲竹垞所賞訪舊鮑谿興可乘。謂歸愚先生

題閨秀姜桂春耕圖

橫橋矮屋帶荒谿，雲外春山面面低。好似江邨三月晚，一林
煙雨鷓鴣啼。

萋萋芳草接平蕪，野寺雲林入有無。想得瑣窗閒潑墨，煙波
彷彿水邨圖。

青鐙白髮不勝情，點染橫圖眼倍明。可是敬亭山下路，繫臣
老去事春耕。桂爲萊陽如農先生曾孫女

送家鳳喈鳴盛之楚中

寒風蕭瑟送行舟，一片孤颿上鄂州。夏口煙波連赤壁，襄江
形勢接巴邱。崇蘭芳杜騷人思，折戟沈沙異代愁。到日關河

春色好題詩應上仲宣樓

平原卹

芳洲度殘雨柳陰生晝寒孤卹隱桑柘迢遞青山端望古懷
國琛風流被林巒書臺久蕪沒清流激湍浚松明夕照斂篠
動時禽還誰爲遡芳躅樓息營柴關

重過小鑑湖

夕霽孤卹路清谿一櫂過斷雲時作雨遠水偶生波春盡閒
花少林陰落絮多桂樓重盼望縹緲隔煙螺

落花

斷粉零香滿綠塢一番花信欲殘時何人解讀傷心賦有客
重吟長恨詞紫陌春深風裊裊紅樓夜靜雨絲絲江南無限
韶華景禪榻茶煙入夢思

題太眞上馬圖

四人執杖遙傳呼二人返顧行踟躕一人宮妝極窈窕結束
自與尋常殊連錢寶馬當道立欲上未上愁難扶宮人嬈媚
各侍側內監絡繹爭旁趨或捧銀罍及粉盞或執寶帕連華
裾得非驪山隨輦去金鐙玉勒同馳驅當年天寶號清晏掖
庭無事相嬉娛紅塵一騎自涪水雲錦萬匹來羌胡長安水
邊南苑裏黃門飛鞚無時無豈知霓裳舞未歇青驄蜀棧徒
欲歔荒宮舞馬淚暗滴夜深風雨鳴楸梧

寄鳳喈武昌

分攜當歲暮雨雪滿關津忽見東風轉江梅又蚤春書愁
遠道尊酒憶蕭晨何日謀棲隱羊求結比鄰

天際碧雲合瀟湘春鴈飛知君官閣裏終日對清暉漢上詩

篇好襄陽耆舊稀東風芳杜若悵望挂颿歸

蓮花峯遇雨

吳山遠勢環如宮翠屏峭列激湖東華山一支竟獨蜀虎牙
孤立森奇峯圖經舊事猶可攷當年菡萏開薰風彷彿金天
華岳上奇葩十丈飄蔦紅我來狂游悵幽討石路犖确拖枯
筇殘鐘渺渺出林際香梵杳杳來虛空西望漁洋勢天矯南
瞻鄧尉形龍嵒具區一碧浩無際汀花浦樹森青蔥須臾白
雲翳旬起化作煙霧春空濛蠟屐衝泥綸巾墊問徑往往煩
邨童是時殘梅已飄盡杏花幾點明芳叢酒帘隱約短笻外
僧寮明滅寒雨中石湖詩版不可見殘碑斑剝蒼苔封欲訪
西空居士宅瀑流挾石鳴琤琮谿山如此少游歷幽棲空復
思臺佟明星玉女不可從名區遙隔秦關雄卽此西岸孤絕

處香茅差足棲疏慵
菖花桂子恣行樂
日日揮麈依長松

千尺雪

山行愛樵唱
況復聽寒泉
映竹穿苔徑
緣崖到藥田
飛流雲際落
急響雨中傳
誰挈軍持去
花龕伴夜禪

石湖懷范文穆公

石湖本勝地
別墅始范公
煙波越谿上
營此五畝宮
天鏡既蕭爽
綺川復沖融
手栽梅千樹
晴雪香春風
身辭簪綬侶
迹喜漁樵從
想當驂鸞歸
願繼鳴夷蹤
平園與白石
來往琴樽同
迄今緬遺構
巖壑埋芳叢
惟聞楞伽寺
夕梵開疏鐘
幽境宛如舊
前喆何由逢
漁簑在杳靄
商飈出空濛
終期狎鷗鷺
卒歲攜煙篷

懷蔣秀才升枚

業鼎

兼寄曹秀才來殷

仁虎

交翠池邊路垂楊起翅塵花時常病酒夢裏度殘春風雨思
嘉會琴尊憶故人雲藍芳訊在珍重托文鱗

吳苑銷魂地何堪賦別離柳深鶯睨院風定燕差池細雨眞
釀暮春蕪短簿祠舊游無限意好爲寄陳思

武林閨秀方芷齋

芳佩

以在璞堂詩集見示卻寄

雙魚迢遞寄瑤華繡閣聲名兩浙誇謝女詩才工詠絮衛嬈
書格妙簪花雲生北嶺開疏箔月滿西湖放短槎回首六橋
煙柳地瓊窗縹緲隔朝霞

寄內四絕

渺渺星河入蚤秋斷雲疏樹一登樓相思今夜西窗月獨對
涼風詠四愁

紅藕花殘憶故廬天涯風物感離居谿橋綠水迢迢遠腸斷

雲藍一紙書

娟娟風露夜初長
睡鴨熏鑪罷晚香
燕子欲歸秋社近
碧梧殘葉下回廊

離亭風笛晚蕭蕭
水館銓殘酒半銷
歸夢不知江路永
夜深還渡赤欄橋

雨中滄浪亭同錢秀才曉微大賦作

秋涼未來暑欲退
紙窗殘雨風淒淒
陰雲解駁日腳漏
我友好事相招攜
詩囊無多每手挈
茶具豈俟煩童奚
翠玲瓏外短畧約
半畝流水堆琉璃
古槐時有老雀啁
天棘高曳疏蟬嘶
荒草一道石屈曲
殘荷數點花萋迷
天憐才人苦遷謫
付與勝地聊羈縻
樓錢孫池館盡蕪
沒小築亭子當迴
隄碧灣翠阜人不
到幅巾獨往倚危
闌卽今遺迹尙如
昨石枅精舍連

招提苔花龕蝕佛火暗灑掃往往勤闍黎僉王自喜一網盡
後來弔古餘酸悽鄉邨本適魚鳥願蕭齋近在橫雲西清芬
分栽蘭桂菊佳果雜致柑檳梨匡牀八尺當晝臥遙聽籬落
鳴莎雞竭來魚城作羈旅年華晚晚睂全低我思吳峯多秀
絕蒼崖碧嶂浮天梯采香涇外硯山下亞牆細路緣柔荑矧
逢清秋漸蕭槭坐見紅葉酣邨畦會須與君放舟去更蠟雙
屐窮攀躋銀鱸雙頭酒百斛江山風月恣評批

雨後尋汲雲庵

石徑雨初歇遠山生夕暉涼風動修竹殘滴滿秋衣觸石泉
聲急經霜木葉稀遵華巖在望丙舍好因依

先曾祖墓在庵東上有大石勒

遵華巖三字係宋淳熙年間題而丙舍頽廢尚未能修葺也

秋晚寄凌祖錫

寒風生北渚暮雨來西洲開門見江水日夜從東流東流去
不息念遠情無極芳序變蕭晨徘徊空記憶憶昔五昔城旅
舍相逢迎悲歌陳慷慨置酒訴生平平生最蕭瑟依依共晨
夕折柳上河橋孤舟仍作客作客已經時江皋鴈信遲清商
紛暮節遠道感佳期佳期渺何處夢向春巾渡彷彿見佳人
攜手申良晤良晤不可常芙蓉落曉霜瑤華頻悵望明月滿
空梁

鴈徵君太鴻

鴈

將歸西湖過訪不值以詩送之

披衣相訪未相親又報吳船指去津老挈樵青供隱伴歸尋
和靖作鄉人觀濤江晚潮如雪放鶴亭寒月似銀秋鴈一繩
來往便長箋寄遠莫辭頻

題趙丈飲谷

虹

小吳船

時太鴻未行
適遇于此

陸處寧無屋蓬窗口晏然人囂知市近巷曲任門偏茗試浮
樣水書緝泊宅編鄰牆斜照遠疑是片飄懸
耆舊知名盛相逢遂宿緣言歸高士宅偶泊孝廉船二老風
流古三冬日景偏到家春信蚤梅放草堂前

曉徵枉過草堂夜話

歲晚嚴風急邨荒積雪高蒙君懷故舊此夕到蓬蒿失喜移
明燭驅寒進薄醪草堂同款語何用首頻搔
貧賤多倉卒生涯足苦辛舟車長道路書劍雜風塵作客誰
知己還家媿老親耦耕虛夙約一飽竟何因

小築臨長谷幽居對短陂家貧凋舊業才拙負明時徑僻苔
生徧階荒鳥下遲生平淒寂意獨有故人知

感激懷良友分攜愴別魂遠游猶未返

家鳳

臥病與誰論祖

錫
道路蒼江隔音書故篋存寥寥餘數子來往共晨昏
少壯容顏改窮愁意氣增詩書從季次湖海憶陳登時命無
煩卜文章或可稱白雲謀送老采藥我猶能

同曉微過慈門寺

蕭條景物近殘冬遙指香林竝過從日午煙消花院竹天寒
雪壓石壇松傳心未得通三昧出世何當叩五宗欲向南原
參大義魚山清梵響疏鐘

春融堂集卷三

青浦 王 昶 德甫

三泖漁莊集

庚午
辛未

添勝菴紀事

蕭蕭翠竹繞溪沙寂寞何人問歲華
三尺蒲帆垂柳外又聞
驚起欲棲鴉

六花幾點上簾時畧怯春寒到鬢絲
小小雲房清似水只留
香篆表相思

隔牆清磬報黃昏
側廢園爐火尙溫更有誰來同索笑
小窗
疎影見梅魂

由崑山南麓過華藏寺望龍洲道火墓

崑山屬華亭此名乃竊取路經天開巖瑞光隔數武春餘表

孤花候暖延宿莽藤蘿挂煙巒
菽麥繡村鳴九峯隔吳淞百
里但平楚茲從梅嶺登江湖入遙睹粼粼白石秀鏤刻謝斤
斧精藍出松篁日午聞法鼓我訊野鶴軒遐想論文侶誰知
青碧間名賢昔容與見震川記層雲忽西來林葉竟颺舉却望有
道阡蒼茫久凝佇

歸雲閣雨坐

閣東爲傳
是樓故址

孤閣掩芳晝急雨來清霜稍看風蝶亂已識林禽樓客居意
罕適書策聊參稽悠然緬東海營此如金閨朝看染翠墨夜
火分青藜重樓署傳是意與茶竹齊縹緗早零落臺榭俱蕪
迷餘花幽逕盡疎柳荒池低憑欄試流眄暮靄生晴覓雲歸
人亦歟望古懷餘悽

喜沈侍郎歸愚先生

德潤

予告南歸

三載春卿值 禁垣抽簪喜見向邱樊譚詩共作南皮會雅
集仍開北海樽千古詞章留虎觀四方冠蓋聚龍門清時文
獻誰能及角里松陵敢竝論

麟鳳文章仙佛身故園舊雨倍情親總持風雅稱詩老嘯傲
湖山荷 聖人笠澤煙消攜釣艇銅坑花放整綸巾近來
好事知多少團扇家家繪畫真

芙蓉湖小泊

疎楊響絡緯月上新雨餘碧雲映空翠玉露沾芳裾遙夜已
幽曠矧復臨澄湖我行三過此此度尤 虛村春隱桑柘漁
唱鄰菰蒲浪紋靜湘簟星影涵冰珠頗與市塵遠彌覺秋興
舒應有世外侶卜築開精廬朝夕飲寒綠燈火繙仙書

熾舟亭拜蘇文忠公像

竹樹罨晴波言近蘭陵郭謫仙小泊處風景尙如昨淒涼嶺
南歸經此偶棲託昔游軫張秦往事空蜀洛近指楚誦亭買
田負宿約西方本非無怛化洵云樂迄今賸遺蹤人思薦明
酌懸知挾飛鸞晚趁橫江鶴

海嶽菴

長虹歇涼雨葭莢風脩脩已經雲陽郭遂見海嶽樓大江浩
東逝日夜蒼煙浮溪山盡一覽輪囷空千秋淨名及寶晉寧
異棲丹邱迄今伽藍神常傍禪燈幽妙高亦無恙玉座臨長
流鸞輪應來往啼髮騎龍虬前徽不可卽塵世如輕漚扣舷
還酌酒欲作逍遙游

龍潭曉發

殘月餘半弦輕風動五兩龍潭此發船煙水空泝泱高槐疎

鳥驚細草秋蛩響不知秋露盈但覺秋山爽我生嗜遠游低
頭困塵鞅茲行豁勝情宛有蓬瀛想江潮如雪翻海日緣雲
上漸近玉鑑堂聞鐘已神往

秦淮客舍遇吳企晉

江海三年別相思隔暮雲那知涼雨後水館又逢君遠道憐
羈宦天涯惜離羣故園松菊在歸去課耕耘

秋江歸興圖爲企晉題

迢遞舒州路羈棲復幾年行吟三楚地時泛九江船官舍連
荒驛山城接渚田故鄉千里思相望渺風煙

汎舟後湖至雞鳴山麓

秋暑苦未闌幽尋挾童卯遂上秦淮船涼颼已吹面鳴雞埭
久荒射雉場猶見當年繡襦迴旌旗輟飛電蒼茫餘霸圖寂

東罷龍戰却緣覆舟山蒼蕪滿蘭甸晷鷺時縱橫蒲柳共蕭
散清響聞雲英編書集朝彥四部詎可求十廟知誰薦還睇
鍾阜長顏陽下溪澗

同企晉升之游牛頭寺坐一鐙樓

空翠落衣屢夾道森松鱗秋清石骨露雨霽苔痕新山寺已
在望天闕雙嶙峋銀杏亦千仞倒出蒼厓根瞻禮古導師了
悟清淨因一鐙衍宗派世與南華論臨高豁遠視閱古悲前
塵當年蕭常侍相賞娛幽真齊梁眇遺蹟支許欣同羣微風
下水葉涼涼穿霜筠還指獻花巖欲蹋東峯雲

大報恩寺十六韻

畫舫停青雀名藍訪赤烏

吳赤烏年建

創脩經六代形勢冠三吳

宮殿同兜率園林等給孤鐸鈴傳替戾欄楯表浮圖星斗當

窗挂風雷絕頂驅燈輪圍遠近梵唄警賢愚峻極雕檐傲高
標繡拱扶曼陀仙女散優鉢樹神敷法鼓千山應齋鐘萬指
趨往常干氣象近漸就荒蕪秋氣凋黃葉霜颺隕碧梧香廚
光照曜碧沼樂涵濡時方脩藏經殿及放生池落日滄江外
朝霞碧海隅鬘雲屯覺地蘭若耀通衢鴈塔留新式龍宮換
舊模他時迎玉輅勝地重南都

登招隱寺

籃輦穿竹林一徑入蘭若夾路青楓殷已識微霜灑泉聲深
磴裏石骨層巖下我從曲阿來標致最心寫戴公昔卜居託
興在郊野逍遙述真經寂寞嗜宵雅衡陽況下賢詎歎知音
寡山水故依然今誰結鷗社再登玉蕊亭一望滄江瀉

晚登宏濟寺

躡屐登空巖重上宏濟寺精廬晚蕭寥鐘魚隔嵐翠高樓更
巉絕登枕得游憩商燈隱疎煙漁唱雜涼吹風寂濤不鳴月
暗徑彌邃下俯長江長溟濛暮雲氣棲禽偶格磔流螢破蒼
蔚既舒旅人懷乃發靜者意名香從空來妙獲無言契神清
骨亦寒歸舟悅難寐

答褚秀才摺升

寅亮

見懷之作

芳露滴蕙草清風來竹林徘徊孤館夕枉致瑤華音以我紫
霞想緬君滄洲心迢迢隔天末

時摺升客
洞庭東山起坐調玉琴

冬日柳上聞企晉已歸硯山用蘇文忠臘日訪惠勤

惠思二僧韻却寄

橫雲山圓柳湖蒼煙杳靄無時無朝看飛鳬晴自浴夜聽哀
鴈寒相呼香稊初熟歡妻孥醺頭春雨良堪娛一林紅葉時

獨往不厭溪路多，縈紆忽聞良友歸。
衡廬爲憶猿鶴秋來孤，九華數點豈不好。
決意投劾還菰蒲，人生合作耕耘夫。
何爲擾擾連昏晡，與君共有歲寒約。
躡屐高蹈眞良圖，寧羨夏屋高。
遽遽堆盤苜蓿味，嚼蠟香林舊侶多。
詩逋抒山篇什憑相摹。

鳳喈從楚中歸相遇吳門仍次前韻

雲夢澤洞庭湖長，風駭浪南戒無冥。
冥細雨斑竹暗楓林，猿猱相號呼千里。
作客辭妻孥江山險絕，俱清娛天門中斷勢。
嶺嶂赤崖卓立形盤紆，一朝挂席辭匡廬。
眺望已徧大小孤，問訊草堂幸無恙。
迴塘清鏡抽新蒲，鳳喈所居在清鏡塘况君才力雄。
萬夫覃經汲古窮，皆晡力攻啖趙述。
左義遠紹毛鄭傳詩圖，名山事業良有餘。
叢書稗說嗤劉遵，故園東指歸而逋楚游。

詩句休追摹

看爾堂集卷三

五

用昌黎會合聯句韻送王侍御良齋先生峻歸常熟

眩目雪花高痒肌朔氣重鳳忽興故園思遂見歸計勇德裝

成一羽輕寒壓兩肩聳曉竅振風向號帆開浪猶湧來養痾

公志便問字我忱鳳結添卜商衣履曳原憲踵德叩筵駭

洪鐘論典溯荒壟曉游常昇輿從境歎望洋恐來徑伉嗟俗

師流傳盡繆種鳳勃罕鮮囊該踏駁徒難冗德逝矣昧火珠

誰歟搜汲塚曉袞袞逐頽瀾紛紛博世寵來先生管道樞末

學作梁棋鳳砭俗論必嚴匹古意未恟德覃思幹元造購籍

損官俸曉幽鍵啟奧窔鈇斤斷拳踵來十道九域採萬卷百

城擁鳳聞昔烏臺遷羣驚白簡捧德志欲懲訓狐沸豈耐羣

蜚曉正色排姝嬰直筆刺微燮來然犀燭罔象強弩射闕墜

鳳喙佼佼厲丰規稜稜振翮鱗德甫乃知一士謬直令百夫悚曉

旋解紫綬還閒薤碧草茸來股酒兵整鞬勒騷壇集球琪鳳遂

初欣歸吳耽榮嗤得隴德甫吾谷峯嶙嶙尙湖波溶溶曉閒身

付蓑笠塵鞅脫桎來股謁來主講席多士資發冢鳳教比時

術蛾文喻吐絲蛹德甫問事愧長頭解疑快曲踊曉茲聆驪駒

歌正值鳥獸來股往矣冰堅腹來思花坼鳳竹立望河干

霜林浩呼洵德甫

雪中聯句

作客欣得朋德甫消寒開酒坐忽焉繁集甫乍疑微雨墮淅

淅愁雲凝曉殘稜寒意作槎枒古樹撐來股啁啾凍雀餓六花

舞欄檻鳳四野洗堀堞灑松密復疎德甫碾塵揚更簸疎篁折

有聲曉老屋壓欲破頗畏酸風火來股差喜酒戶大韭芽糝吳

羹鳳密餌歌楚些食單列無多甫德新詩聊可和醉吟馬耳埋

微曉狂擬驢背馱我儕苦羈孤來生計每摧挫今秋望倉箱鳳

連村收秫稌歲宴緩租庸甫德時平謝勞瘁矧見宿麥抽微曉益

資春種播對景良足歡來稱瑞彌當賀蝻蝻類已殲鳳松栝

寒食裏日戰勿致師甫德閉門任僵臥微曉

雪後宿西疇閣與升枚夜話

殘雪出前簾響挑燈入夜聽偶看池上月共坐竹間亭蠟燭霜

初下烏啼酒漸醒蕭晨重話別煙際理松船

沈孝子詩歸愚先生作傳

曾聞一逝成千秋誰與至性超同儔沈君自少敦嫠修生平

奇節驚庸流探丸嘯侶纏兜鍪竈娃嬰婢嬰公矛視血漉地

中恒憂以身代父何咿嘸荏苒遂去無相仇九龍灘險乘鳧

舟奔濤激箭煙雲浮獐颺震盪聲颺颺失勢一落成鯢鮪攢
身下水衝陽侯相援竟得棲沙洲便出薄夜供晨羞更生有
喜彌神庥東鄰曲突無良謀擺磨出火騰林邱神焦鬼爛靡
存留直入負母精神迢還視髯首心蹇妯赤嫫感動來干掇
空堂莞結仍幽幽中年孤露悲松楸楣柱苴杖形臞腴祥虞
中禮敦苟媮鮮民銜恤幾王哀觀者嗟歎相喧啾百年歲月
如浮漚故老零落誰詳求吾師文筆同韓歐作爲記傳傳方
州川事史冊資徵搜況今 孝治垂鴻猷表宅有典行遐陬
曷不抗疏陳 珠旒定見綽楔森烏頭勿但傳詠供吳謳
由木瀆至光福宿奉慈菴曉登聖恩寺四宜堂望太
湖諸山還泊虎山橋同企晉策時作

小艇度斜橋北行向光福雪消露蘭苔雨霽淨篁竹冉冉見

江梅盈盈照溪綠淒風忽西來衣襟染芳馥香界此沿洄忍
寒意亦足矧有出世人孤標等冰玉相與呼青奴茶溫酒初
熟

斜照轉林麓寒雲罨湖陰落帆過淺嶼宛對羅浮岑捨舟入
窈窕策杖歡登臨深蘿竄飢鼠密篠翻珍禽適窺荆扉靜遂
造精廬深甘泉通竹筧偶滴如絃琴疎籬散叢雪漠漠沾清
襟還餐松花飯共作擁鼻吟

寒鴉散林表落月明牆西幽人襆被行夾道香初齊迎風半
開落暎水綵高低背人宛獨笑對我如含悽恍疑翠微路姑
射脫幽棲澄暉上東嶺曙色開丹梯遠聞塔鈴語松篠藏招
提

仙緩叫絕障野鶴鳴崇崗身行花雪裏鼻觀參微香竭來四

宜閣舊頃開湖光莫釐旣髣髴石公亦微茫羣峯七十二點
點分青蒼漁舟若鳬鴈欸乃煙波長窅然遺身世濯足歌滄
浪

茲山剏萬峯三峯後繼起緇流共接席珠林照清綺日午不
逢人香雲覆流水石牀瓶盃存憑誰研法喜更窮碧照軒幽
興何能已斜暉下竹林牛入蒼煙裏禪房放梵終佛屋明燈
始沿月向湖麋獨喚孤舟機

水明殘夜靜小泊依山橋扣舷望西崦圓魄升松梢波澄鏡
皎潔露下風蕭騷江梅宛送客肯使芳華凋所愁清夢覺翠
羽紛刁調他時五湖秋再約乘蘭橈

舟還木瀆別企晉

梅海行來畫不如雲將同此上盤輿溪山處處漁樵伴村塢

家家水竹居喜有晴光飛乙鳥慚無吟卷繼辰魚

時讀鄧州志中有

明梁辰魚詩甚佳

列仙儒竟推君獨後夜相思隔望舒

春感

東風飄蕩沈郎錢躑躅開殘倍可憐柳絮橫塘三尺水年年
辜負載花船

芳草裙腰一道斜王孫消息渺天涯青苔小院無人到暮雨
瀟瀟落杏花

養花風裏夜更遲蘭燼香消欲睡時料得繡桐吟罷後綠窗
明月寫烏絲

畫篋粉消金鏤盒紗幘香減藕絲裙故園夢去分明見小折
梨花對夕曛

宋人梅花長卷爲企晉題

微霜下蘭皋芳各已歇淒淒歲欲殘寒花見幽潔夕霽明
清流空林上初月遙憶昔時人孤懷寫冰雪

煙村在何許渺渺依雲岑閒門隔流水脩竹鳴寒禽微風湖
上至餘香散疎林對此起遐慕太息墜塵襟

愛君卜閒居欲作五湖長疎花散幽香寒流發微響以茲清
淨心披圖愜幽賞空山雨雪多相期共來往

無題和企晉策時

繡幌璇題接畫牆昔時曾住永豐坊已憐元相稱中表未許
檀奴預末行傳粉共盤紅綬帶熏香爭珮紫羅囊遶牀竹馬
年方少誰省微波足斷腸

幾載煙波別玉真瓊樓重見寄花人

見過去因果經

露涼紅粉穿鍼

夜風暖青蘋被襖辰裙袂吳綾分燕尾釵梁楚玉刻魚鱗名

香儻許經行共敢向芝田擬洛神

櫻桃欲謝掩重門肯爲春殘一愴魂
珠佩自稱羅萼綠瓊函
常事魏華存脾分碧樹占花信
欽劃紅欄記月痕更蘸泥金
書玉檢銀鳧縹緲麝煙溫

鬱金堂北玉欄杆竹密花深欲到難
燈下瓊簫聲引鳳煙中
綵扇畫乘鸞梧桐月轉珠簾靜
荳蔻香消寶簾寒小疊紅箋
何處寄連絲點點濕冰紈

紅輪碧瓦夢迢迢不分三星在此宵
鶴館靈僊懷許掾魚山
神女降弦超低鬟細語瓊籤靜
擁髻微吟綵燭銷晴雪迴廊
殘臘近蠻牋十樣頌春椒

橫塘東畔柳如絲約畧春寒病起時
錦檻花濃鴛睡暖玉階
風急燕歸遲香添屈戌間調瑟
雨潤罌恩晚鬪茶取次踏青

時節近王孫芳草最相思

雲母屏空閉玉除隴西上計感離居吳綿夜冷相思淚蜀錦
親裁遠道書兩省香銷霜落後兼葭風定鴈來初秦嘉從此
成漂泊誰理明璫伴曉梳

朱鳥文牕掩碧紗嬉春懶上七香車綠池過雨生芳草青瑣
無人落杏花寶帳獨看圍蛺蝶清歌誰共譜琵琶最憐紅板
橋南路官柳絲絲起暮鴉

蕭晨落鎖畫堂開花影扶疎上翠苔鳳脰燈銷寒未減蝦鬚
簾捲夢初回熏餘繡領移簫局調罷香脂拂鏡臺悵望西洲
芳訊遠玉羅牕下折殘梅

璇闥承日惜娉婷愁向衡皋望短亭芳信未傳金翡翠閒情
誰按玉瓏玲杜鵑啼罷棣風薄夜合開時竹露零晴碧樓前

銀漢轉新蟾影裏拜雙星

罨畫樓臺作晚陰
瀟湘六扇翠筠深
妝殘自掩茱萸帳
酒醒低垂瑤珥簪
夜雨夢回煙浦笛
秋風寒動楚江砧
東堂折桂歸則杳
金薄搔頭夜夜心

鯉魚風起峭寒生
明鏡瑤釵憶敘情
錦字空留香漠漠
羅衾曾漬淚盈盈
綠蕪小院人千里
碧蘚空階夜五更
何日玉櫳偕寫韻
便攜笙鶴上瑤清

送張鴻勛

棟

凌祖錫褚掇升錢曉徵曹來殷赴金陵

召試

柳外東風度
翠旗恰宜獻賦向
鑾輿璇宮方上升
恒頌碧海頻傳
賜復書建業鶯聲
新雨後滄江颿影
夕陽餘自憐抱病
風塵下遙望凌雲
重子虛

山塘雜詩同朱上舍適庭

昂

及企晉升之來殷作

芳草東風二月天杏花春水一溪煙
桐橋南去絲絲柳多少
濃陰覆畫船

落梅風定雨廉纖
水岸春波一夜添
好是玉羅牕格下賣花
聲裏捲珠簾

絲燕紅萼望中迷
白舫青簾到欲齊
正是嬉春風日好黃鸝
啼過玉樓西

疎柳微黃映畫旗
輕陰漠漠雨絲絲
橫塘二月春如水誰唱
當年白傅詞

寒更歷歷夜迢迢
水館春深奏玉簫
銀燭未殘明月上
一溪花影度紅橋

纔過花朝是禁煙
銀泥畫舸盡堪憐
客游又度傷心節
日日

船牕跛脚眠

題翁徵君霽堂照飲酒圖

我聞東臯子結屋耕河濱君平坐召不可致醉鄉作記全其
真又聞白左司退官居渭上高臥吟詩獨閉門雨中盡日傾
村釀兩賢高尙世所無不惜痛飲稱狂奴暨陽先生昔嗜此
更情好手成新圖鴟夷縱橫列左右訶陵錯雜羅前後曹事
惟知中聖人醉吟每結空門友甘載江湖載酒行人間問字
爭逢迎龍頭犢鼻聊寓意豈有芑角胸中生九月西風木葉
下故山黃菊行堪把比鄰近局共招呼杯中宜有珍珠瀉我
亦生平倒接離興酣聊復一中之白衣何日來經過細和淵
明飲酒詩

聞過湘雲

春山計有感

巾拂條然謝世喧
巫陽猶復望修門
曉夜鵲空招隱秋菊
春蘭藉禮魂
雪僧來開貝葉
碎琴客至醺芳蓀
五湖花落
貞歸去吟斷清詩
浥淚痕
君有詩云我本治洲一散仙頭花
零落五湖船如何對此不歸去七

十二峯
生曉煙

普照教寺

寶地雨初晴
縣蠻報春曙
夙知普照名
蠟屐此吟步
寺傳慧
旻開榜記乾元署
繡朶軒旣蕭閒
涵暉室足閒豫
條條海月
堂長共眉山
仕鐘魚時有聲
香火久如故
景蘇閣暨懷晉亦
名前修已雲鶩
惟欣西方觀
託蹟在閒素
綠陰覺晴廊
青苔
潤蘭路還撫北碣碑
低徊未能去

西林禪寺

鮮巖卷層陰
落景在林杪
逸興晚未闌
放艇春江渺
遙瞻翠

堵波髣髴露雲表穿逕信逶迤登桃復訪宛創興歷宋元勝
槩俯峯柳上方諸品寂香外鐘魚曩遺研梵策書始悟桑門
好有爲本非法無相乃能了誦帶契忘言便衣事幽討還叩
西疇禪于焉洗煩惱寺爲僧法編所修編受法于徑山北邱西疇

酬大木先生

京雒歸來三十年酒瓢詩卷作因緣宛邱詩法誰人會接蹟
家風在後賢

最憶風漪堂外路疎梅瘦竹菴清池知君禪榻茶煙裏日課
香山半格詩

頻年身世媿嗟吿短句長篇感慨多誰向旗亭來畫壁雙鬢
小部唱黃河

漂泊江湖會面難常從驛使報平安何由買得閒田地老屋

青燈耐歲寒

送曉徵舍人之淮南總河幕府

相送淮南去迢迢千里程北風吹五兩幾日過蕪城夜火明
山縣寒笳響戍營到時秋汛急辛苦念民生
東閣開樽日南樓點屐餘新詩供嘯咏妙理析元虛三十三
山客憑君問起居懸知對牀處詳晰考河渠

送歸愚先生游黃山

一帆遠溯富春潮直上天都道路遙萬古煙霞開絕頂千層
殿閣倚層霄丹崖翠壁終飄渺白鳳青鸞久寂寥想得高峯
長嘯處蓮華石筍鬱岩巖

聞說仙人有舊壇丹經寶鼎秘層巒蒼松拔地枝千尺碧嶂
凌空路百盤鳥道遙連雲氣合龍潭倒掛瀑泉寒自憐枉負

名山約未得相從倚杖看

八尺晚泊

亂鴉啼密竹溪口泊吳船潮落見收網風高聞扣舷湖雲寒
作雨山樹晚生煙帶索誰家子行吟意渺然

重過尙湖寄蘇顯之及家碩夫

碧水渺無際秋帆喜獨乘絲垂三汊柳花落半湖菱雲樹情
方永煙波樂更增相期招地主來此下寒罾

清涼寺

遙望三峯晚松篁罨碧雲幽禽臨磴語香梵隔溪聞逕曲流
泉咽壇空夕照曛孤筇歸路遠涼葉墜紛紛

竹堂秋夕寄張策時

晚涼松露滴山月墮西林提席坐苔逕臨風張玉琴蕭條高

館裏寂寞脩梧陰無復共幽賞煙波勞素心

送張鴻勛之武林書局

高陽舊侶悵飄零錄別河橋柳尙青秋水一帆離北郭涼風
幾日到西泠澄湖山色愁中度遠寺鐘聲夢裏聽曾是翠
華臨幸地好將盛事譜圖經

題鴻勛所畫漁村晚霽圖

碧玉煙中遠嶂青
瑤雨後寒流結个香
溪田舍遠蘿楓葉鳴
秋

落葉逕無人蹟
酣霜林有鴟
嘯屋後千叢竹
秀門前三版橋
低

沙觜斜陽渺渺山腰秋樹娟娟攜得瓜皮艇子菰蒲深處鳴

艇

數摺汀花浦樹幾梭蓮浪蘆漪好挈背蓬圓笠村南來約只
師

旅夜寄浚祖錫

橫雲東望渺愁余蕉萃風塵未定居水館孤燈秋夢後江城
新雨夜涼餘白蘋花發思鄉信紅豆歌殘憶故廬何日吳淞
江畔路扁舟一棹共樵漁

同企晉斗初過上沙入水木明瑟園還望礪上草堂
振衣潭上行水木遠明瑟相攜入名園初晴值秋律層軒抱
池開修逕依林出紅藥冒曉煙珍禽語初日泝東信逶迤視
北最蒙密孤亭仍翼然往者隱遺逸依稀介白蹤煙霞遂痼
疾後賢復此居名流萃膠漆曾移太史星未賦畸人室勝地
稍荒蕪新涼漸慘慄還思礪上堂高風渺難述冰霜表清貞

書畫寫真率百世良可師三吳誰與匹

禮堂寫經圖爲鳳喈題

兩漢以來盛經術後鄭著作尤超羣旁通七緯驗飛伏遠究
三統窮幽元發爲箋註百餘萬扶風涿鹿難同倫微言大義
昭宇宙皎如日月懸乾坤惜哉徐州避地去不得寫定傳諸
孫曰西方暮恐失墜作書訓誠含悲辛何爲景侯逞私意妄
恣排擊爭讙喧中間復遇孝昌亂師承家學嗟沉淪誰能更
向千載上遠思一髮留千鈞吾兄崢嶸起東海覃精畢力窮
天人常登金臺叩閭闔手拓石鼓搜遺文復從武昌遡樊口
坐看江勢來峨岷一朝扁舟忽東返遭經獨抱歸荒村詞章
輦悅不足道要在經義窺淵源手編五禮作類考州居邵次
羅紛繁空堂幽幽人蹟絕耽思旁訊忘朝殮深衣皮弁氣象

古大帶赤舄儀容尊庭前幼子來問業接武布武何溫醇羨
君此圖信千古如君撰述真紛綸他年立朝典制作定使
至治追羲軒卽今空山自負犢亦足矜俗開愚昏經師况有
沈惠在謂冠雲定力追北學偕窮論不朽大業著藝苑會看
通德來題門宇兩徵君

寒夜集家岡齡庭槐小停雲館分得露字

日落孤館寒騭人感歲暮相於訪素心依依接情慄眷言邱
中緣共遵花下路叢竹來西風孤松滴寒露同矚青芝山蒼
蒼起煙霧稍欣塵慮忘琴樽得佳趣夜深纖月明流光照疎
樹蘆間漁火生雲外禪鐘度星霜從此辭悵然念良晤

春融堂集卷四

青浦 王昶 德甫

鄭學齋集

王中
癸酉

璜川書屋喜晤趙升之時余與企晉將往金陵

三年輾轉不相見江湖淪落俱貧賤子方抱病守衡門余亦
辭家居異縣今春鼓櫓闔閭城吳郎倒屣相逢迎開筵爲置
玉壺酒設饌更進金盤羹挑燈共對忽不樂遙思故舊嗟離
索遠道方愁積雪高前溪已報孤舟泊攜手相看一解顏却
陳舊事雜悲歡九秋伏枕已憔悴八口求食徒艱難憶昔相
逢在白下書牀花嶼娛清暇嵇阮風流世所稀應劉文采誰
堪亞一別蒼茫歲月馳短衣雄劍返茆茨高歌恥學干時術
落魄常餘感舊思人生會合知難據斷梗飄蓬隨所遇後約

空期茂苑游離羣重向金陵去明憐沿流放畫橈滄江風急
雨瀟瀟祇將元武湖邊信遠寄春申浦上潮

京口聞潮

蓬牕半夜聞疎雨逢尾寒深人自語始知風捲暮潮來颯颯
清流滿孤嶼勢衝沙背斷還連聲激殘蘆散仍聚我憶焦山
枯木堂燭冷香銷曾聽取隔溪漁火半微茫對月梵音雜淒
楚而今江海尚飄淪病身難借觀濤愈不如木石等吳兒弄
潮日向春申浦

龍潭遇雨不得游寶華山悵然有作

冥冥江雨繁活活春泥潤竹靄雜松雲不辨峰嵐峻遙緬寶
華山誌公此發軔銅殿祕華璫戒壇契香印羣遵梵網嚴妙
獎毘尼進茲日阻招尋多生愧起信入暮溪館寒孤燈半成

羣獨夢碧琉璃還思寄芳訊

同企晉來殷眺後湖

西上鷄鳴山北望元武湖湖濱雪消春水漲十里漠漠湘紋
鋪青溪秦淮互暎帶覆舟鍾阜相縈紆白波碧嶂非一狀江
山奇麗南中無憶昔創始自寶鼎開渠引水勞千夫大興元
嘉邇增飾華林宮闕雄南都朝吟新詩召詞客夜設綺席陳
宮奴繡襦玉漏一瞬耳六朝佳蹟堪嗟吁射雉場空長宿莽
聞雞埭遠餘寒蕪惟有茲湖向千載浴鳧飛鷺相嬉娛嚴城
烽火出畫堞古寺鐘梵來浮圖徘徊弔古不忍別回看落日
煙模糊

自牛首山至獻花巖同企晉作

春雪已盡消春風亦漸轉浮青雲外出嫩綠草中顯我友選

勝懷呼朋往游衍出郭三十里修途近層巘石亂泉暗響松
深徑難辨此間名天闕壯觀恣睎眄祖堂與幽棲歷代勝堪
選古蹟不盡存遺墟尚可緬相與循兩崖苔滑誰能踐拾級
喜先登敢辭雙足趼

隔林聞寒鐘引入招提勝碧雲見青松嵐翠更相映屢屢望
孤巖透迤盤曲徑聞香入寺門龍象諸天正融公啟道場瓶
盃南來盛古公復繼之一一華嚴境豈惟願力深實藉禪心
定欲尋十笏齋于此愜幽性

秦淮

攔街猶放上元燈比似秋來景倍增絃管風和聲細細綺羅
人遠影層層半輪蟾月依簾下幾樹梅花隔檻憑況是石城
多俊侶不辭浮白共飛騰

吳閶雜感

東風早過試鐙天又是清明欲禁烟愁絕通波橋下路杏花
微雨溼秋千

翠葉成陰倍可憐
鵲青人去草芊芊
桃花落盡春無主約略
東風到杜鵑

芳渚迢迢送綠波
紅欄橋外畫船多
花時玉笛三更月齊唱
江南水調歌

板橋楊柳一枝枝
嫩綠柔黃日影遲
誰向東花簾子下玉簫
重譜斷腸詞

玉蘭花發度芳辰
十里長堤起麴塵
寂寞金閶亭子畔綠陰
門巷送殘春

水國春寒唱竹枝
誰人更奏玉參差
江湖載酒心情嬾
禪榻

茶烟感鬢絲

小院蘼蕪綠幾叢落花飛絮滿牆東
衣香人影年年事都付愁中與病中

絳蠅初殘寶篆溫春來無處不銷魂
故園忽憶吳淞路細雨菰蒲水到門

沙布衣斗初

維杓

黃孝廉芳亭

文蓮

吳企晉趙升之

及朱上舍吉人

方藹

枉顧寓齋同曹來殷過滄浪亭

至韋公祠而別并訂西山之游

綠草盈堦生春光靄已暮同人相過從
依依話情懷溪樹藏鳴禽蘭皋落飛絮
一咏滄浪吟幽尋共微步

平橋凡幾曲綠水生微波東風一以至
落花行復多溪亭紛窈窕竹樹森陂陀
歐梅久寂寞懷古情如何

行行遵枉渚言尋韋公祠青蕪被苔逕綠樹陰堦堦緬懷流
亡句千載同歎歛昔賢不可作此意誰能知

夕霽明春流池塘忽已晚林端古堦斜煙外蒼山遠悵然從
此辭悠悠卽長阪幸有山中游佳期庶能踐

家秀才存素

條

爲畫三泖漁莊圖因題六絕

生平不擬託樵漁故紙堆中作蠹魚賸有恒春橋下屋更煩
老筆畫幽居

米堆稻廩隔溪明薑菜花繁豆莢榮落盡緗桃春過半煙中
布穀勸躬耕

春

漠漠山雲午漸收新苗雨過綠如油捲書還向橋南去垂柳
陰中課飯牛

夏

小小茅茨儘日間偶然生計雜漁蠻高梧搖落秋槐盡望見

東南數點山

吾鄉九峯玉屏蘭笋四山秋後皆可望見秋

柴門不啟槿籬斜小雪西風餞歲華喜見東臯滋瑞麥更開

臘酒伴梅花冬

溪山平遠是南湖畫出幽風小樣圖說與江湖諸舊侶頭銜
從此作潛夫

同作

長洲 沈德潛 歸愚

魚扈連延接鴈汀伊人新勒草堂銘三重湖泛天邊白九
點螺橫島外青菰米飯炊香淡淡水仙操動韻泠泠往來
時有樵夫迹問答微言愍性靈

題王孟端畫竹

古來畫竹豈勝數要在雅尚先孤超取神工意不工似斯覺
格外留芳標蕭郎竹譜誰得見輞川石刻今蕭條洋州松雪

並蕪沒妙蹟何處存生綃友石山房最幽潔頗愛月夜聞清
簫何時寫此數尺畫淋漓淡墨橫霜毫不疎不密互掩冉若
遠若近通迢迢慧車山水吾肺腑乃得此意煙雲高想當六
月挂素壁不畏溽暑蒸炎歊生平癖好異喧俗拄杖叩門何
辭勞一見眼明欲輕舉但乏好句如瓊瑤空庭無人黃葉墜
書罷日落風刁騷

遠翠樓月夜有寄

東望吳淞路渺漫月華如水露華寒離鴻聲斷銀燈暗睡鴨
香銷玉漏殘遠道頻傳黃絹字佳期遙隔碧雲端金波三五
依然在莫怪方諸淚未乾

題翁丈霽堂三十三山草堂圖兼送其北行

君山黃山高翠嶽蒼崖碧嶂青巉巖松風亭榭各杳靄石潭

澗壑爭空嵌茶岐覆酒及彭墓

皆山名

岡阜山沒森岑崑下瞰

長江落東海洪濤急溜何冲颿山盤水鬱儲靈氣宜有碩士

超羣凡譬之森森豫章木就中獨秀惟松杉先生天才本卓

犖元文自少參機緘生平嗜學五十載矮臆短檠恒詁誦篋

中著述自祕惜一一金薤垂琅玕力追風雅宗漢魏下逮唐

宋供雕劂詩才已足雄一代經義更欲窮千函緬思孫

文馬

不可作鄭學往往遭譏議詩箋禮注絕業在諸儒同異勞

爬芟昨者翹材大闢館鶴書鄭重來空巖掉頭一笑不肯顧

荷衣豈願更朝衫三十三山幸無恙漫郎漁父稱頭銜朝聽

飛泉聲颯颯暮看新月光戢戢蘋溪把釣泛小艇竹院種藥

攜長鑱題襟載酒有素侶相與酬倡揮秋毫輓川朋好和裴

迪左司弟子來王咸襄陽耆舊月泉社主盟風雅誰能監卽

今鶴髮垂過耳猶自健步追麕麋籃輿筇屐足行樂底事節
杖相扶攬 國家雍熙尙儒術大臣薦牘本至誠石渠天祿
久寂寞須待都講窮洪纖莫向白雲愛高臥亟趁六幅煙江
帆

雨後同斗初企晉來殷過支硎山寺

杳杳白雲合空山欲暮天青松滴疎雨碧澗響寒泉風度竹
房磬燈明茆舍煙愛看林際月流影照溪田

雨夜宿靜菴上人法音菴

苔徑滴寒雨草堂明夕燈疎鐘沈遠寺落葉下荒塍習隱偕
宗炳棲禪共惠能秋山應更好明發試同登

寒山別館

自別寒山路重游六載餘風泉秋更響霜竹晚來疎翰墨留

遺宅雲林憶隱居盤陀一片石吟眺渺愁予

法螺

修竹杳無逕秋禽自在唳松雲開遠嶂石澗響迴谿叢篠緣
階上疎花入戶低不逢向居士誰與共禪栖

秋夕宿楞伽寺

涼雨夜蕭槭清溪流暗泉稍聞宿禽響時墮西齋前短鬢已
如此素心誰更傳無生思妙契願證永嘉禪

陸魯望祠

渺渺寒波動碧虛天隨祠廟對荒墟聯吟尙憶松陵集勝事
空存笠澤書泉石高風留史冊江湖遺蹟感樵漁獨憐杞菊
無人薦斜日空庭落葉疎

橫塘

菰蒲秋水晚生涼
杳渺青山送夕陽
十里藕花香不斷
畫船燈火到橫塘

新月

遠水殘虹送夕陽
又看清影度梅梁
珠簾乍捲銀鉤冷
玉鏡新開翠黛長
早鴈星河光黯澹
棲鴉池館夜昏黃
故園忽憶蕉花逕
下拜曾同一炷香

綠苔生閣晚蕭條
一抹微茫近綺寮
清景難同仙漏永
澄暉欲向暮煙銷
玉繩夜轉吟徐鉉
銀漢秋橫感鄭遙
最是離人魂斷處
西風疎柳似殘宵

西窗人靜掩珠櫳
依約初弦薄暝中
一縷晚沈秋水碧
三分斜映暮霞紅
金盤露冷低蘭渚
玉笛風寒暗桂叢
料得曉妝初罷處
恰將眉譜鬪玲瓏

娟娟翠色下檐楹漸到西南倍有情花外銀屏光尚淺階前
瓊樹影初橫玉鉤仍照人千里桂魄難禁夜五更惆悵烏啼
殘夢後獨留珠斗在瑤清

九日企晉相招小集因病不赴以詩見示賦此奉酬
風雨重陽節候臨書來相約比兼金畏涼只喜蒙頭睡強起
猶爲擁鼻吟吹帽遙知詩筆健漉巾誰愛酒杯深病中歲月
匆匆過應俟春來再盍簪

邨居雜詠

卜築離塵市栖遲掩石關芥花下試砌草雨中刪鳥散茆
檐寂香銷竹院閒小樓簾半捲恰對夕陽山

硯譜隨時讀漁經信手鈔幽棲思五柳真逸憶三茅乘月開
琴匣衝波載酒看自憐才性拙彷彿似青匏

竹榻臨疎牖藤窻對小池漆書明古本石墨校殘碑
飛絮時時落疎花故故垂此中愛靜寂祗穢豈能知

藤刺輕衫胷苔痕短杖粘緣籬收豆莢臨砌辨花籤
爐焙雲腴潤庭移玉版尖徘徊當薄暝一桁照新蟾

夜衲漁舟服苕簷野屋窻遠山春緯繡涼雨暮琤琮
短笠勞僧送疎鐘愛寺撞靜中殊自得非擬鹿門龐

圓泖煙中寺吳淞水上亭柳絲風嫋嫋蒲葉雨冥冥
游屐隨來去行歌雜醉醒生平江海意幽興託松齡

飯慶陽院訪水月軒故址

曉聞雲外鐘徐出山閒寺蠟屐載招尋禪宮洵幽異
霜餘楓葉稠雨過禽聲細偶領旃檀香兼飫伊蒲味
遂訪水月軒前賢渺延企懸知秋夜長遺經究深祕
未成春曹詩自撰讀書

記標格接清翁師承軫遜志晚從白鶴仙素業久凋墜丹泉
俛澄泓竹屋起涼吹還度錦溪橋斜陽疊蒼翠

秋暮入簞山圓智寺望圓渚

我從六峯來櫟櫨向溪口碧雲如有情招邀出林藪遂尋開
土居遙聽霜鯨吼天馬勢猶騰神魚化已久小山儼屏障濃
綠撲窻牖何人斲石骨一試干將手西風忽淒寒計日過重
九聊分出竇泉稍代盈樽酒俯眺圓渚湖漁村隔疎柳更聞
欸乃聲煙中屢回首

泊細林山下夜雨

落帆長谷東煙波漾微暝初月下蘆碕層霏隱漁徑時來蕭
蕭雨隨風動清聽遠參寺鐘疎偶雜村舂應遂增秋意寒彌
使禪心定獨客黯青燈同誰賞幽興緣知雲外山詰朝倍脩

說

紫堤

夏考功允蔡沈淵之所

望重三吳社身填百尺潮清廉循吏傳哀慟義公謠玉樹還

同隕

謝節愍

霜松亦後彫

陳黃門之沒後考功月餘

空傳堂斧築難覓楚辭

招

盛侍御符升曾葬考功有詩云在小崑山見釋堂詩鈔其墓今求之不獲

題岡齡南園新居次歸愚先生韻

小築新開水石居松篁蕭瑟潮川如麝煤靜校雙鉤帖魚卵

分題四部書元亮閑田供種秫杜陵小徑足栽蔬枯荷折葦

楓溪路吳詠吟殘獨掩廬

蓬蒿甘作野人居蕙圃梅坪畫不如叢篠風生聞鳥語疎槐

葉落見蟲書山厨曉煮青精飯藥徑晴分赤甲蔬水北花南

誰與共羊求來往伴衡廬

招恨停雲少舊居羨君接蹟有誰如

君齋額小停雲

藤窻小幃梅花

卷竹榻新簽貝葉書雨後評茶移石銚尊前翦韭足香蔬不

須漁火江楓畔煙水迢迢憶故廬

君舊宅楓橋

橫雲山下卜幽居料理殘經日晏如六學先推虞氏易千秋
已定伏生書伯愉自分終邱壑季偉知能具草蔬可許叩門
頻看竹茶煙禪榻共精廬

題姜孝廉靜宰

恭壽

秋夜讀書圖五十韻

金行黷斂風訇哮鶚鵠夜語啼鵲鵠繁霜敲野枯芡菰誰結
老屋營香茆君才兀冢雄虎虬經笥義府供爬抓發爲奇作
盤螭蛟洪河決滌峯巖敷落紙十手爭傳鈔廿年作客揮長
鞘馳驅南北淩礮礮斑斑櫺具光文鯨軟紅不惜緇征袍沈
錢散玉多蘭交詩歌倡和如笙策陳設壇解誰謹呶汗漫忽

憶山靈嘲故園無恙歸巖坳回溪綠淨疑湖淥歸來結隱棲
書巢駒隙忍使從閒拋墜葉蕭械飄危梢階語蠨蛸纏蠨蛸
老鶴孤宿拳矛散玉盤出海懸高樛銅蟾燈燄花含苞中夜
雜誦聲警嗃漏籤每至鷄啾嚶倩人擣麝和魚胞作畫爲解
丹青包我亦避俗辭紛殺蟬函蝨簡供珍庖禮宗鄭氏辨禘
郊易師虞氏探蓍爻會稽北海咸崢嶸惜哉陋儒徒無休詩
學近更多輕詆西江格律人爭蕪槎枒寒瘦矜私佼漢魏初
盛垂雲旂何李繼起同雙嶠底事彈射飛金幣汝曹磨滅猶
流泡隻手誰爲懲昏愒望古灑淚常心勦知君信我言非曉
苔岑夙契漆投膠願扶古學除鼃咬興酣攄寫煩推鼓偶倣
時格母訾訾

秋夜寄曉徵于京師效元白體

露菴聲咽鴈聲遲薤簞初涼欲睡時吟遍閬州元相句憶君
無計寫君詩

當時競說王錢體醉墨題詩蜀紙紅不料有人摹本去家家
粘遍畫屏風

曹郎勸酒紅螺盃馬叟徵歌白鴿鹽絕憶嬉春來往路幾枝
疎竹亞重簷

萬年枝上娟娟月此夕知君侍建章吟得翻堦紅藥句好傳
芳訊到江鄉

同朱子存

研

適庭凌霄

漢偉

肅徵

荏恭

孟容

士廉

游

天平山

雨過泉聲急迢迢出翠微白雲松際寺紅葉竹間扉日暮疎
鐘斷山寒過客稀只應修靜社來此坐忘機

寄周秀才欽萊

準

問訊迂村叟憑誰共歲寒遠游登白嶽投老向黃冠壯志虛
千里悲歌感萬端青鐙茆屋裏風雪獨盤桓

寄徐上舍穀函

以坤

德清

歲晚匆匆別分襟一黯然人歸三泖渡客上五湖船雨雪懷
良晤溪山憶勝緣餘不春漸好相望渺風烟

茗水溪邊路聞君有故廬樓臺明鏡裏雲樹夕陽餘篋滿新
題句家藏舊賜書相商攜釣具來共卜幽居

題盛上舍青嶼

錦

細雨騎驢入劍門圖

若遠若近山有無忽起忽滅雲模餬峯如玉簪互重疊水似
羅帶相縈紆蠶叢鳥道古天險蒼茫直控西南隅鞭絲在手
笠在頂竭來劍閣驅征驢羨君意氣本豪縱揮斥八極隘九

區江山奇麗入眺覽不畏閣道多崎嶇踏泥盤盤躋絕壁眼
界開豁窮遐陬俯眎河潼在几席遠瞰沔漢同杯盂煙中彷彿
辨荆郢鳥外縹緲連夔巫爾時雨師作狡獪奇景變現來須
臾枯林冥冥叫猿狖苦竹颯颯啼鸂鶒長嘯忽憶渭南伯當
年此地想馳驅流傳詩卷七字在千秋清興誰能如便倩好
手拂繚素雲烟咫尺生空虛我思放翁在西蜀女真日日尋
戈戈大散關前烽火急秋風鐵馬凌晨趨賦詩草檄感大義
中原未定空嗟吁方今太平一寰宇梁益以外歸方輿白鹽
赤甲冠天下但有絕景供嬉娛古今俯仰事勢異性耽山水
無差殊今君席帽回東吳邁跡近託先人廬山塘晚霽水漠
漠銅坑雨過花䟽䟽韋公白傳來往地曷不放櫂游五湖更
替一片好東絹重寫裴笠元真圖

家二癡玖亦作漁莊圖題兩絕句

斷靄殘雲隔遠汀柳陰深處見魚舫莫嫌水墨翻新樣還是

山人舊典型

二癡爲烏目山人季子

新栽校訂伴元真修竹鄉間作隱淪他日期君來過訪綠蘋紅蓼共垂綸

送霽堂之淮上

作客同誰侶蒙君獨過存長貧憐趙壹知己感虞翻聽雨開書卷尋山命酒樽相逢仍話別黯淡欲銷魂

三十三山裏茆齋傍翠微夕陽栽藥圃春水釣魚磯石逕花爭發雲林鳥自飛何時歸隱去載酒過柴扉

藥裏憐多病征衣念暮寒匆匆臨遠道款款話加餐蕙草春前發梅花雨後殘文游臺畔路吟眺足清歡

企晉招集遂初園

夢覺聞鳴禽松檐雨新霽良友相招尋春風送蘭棹遙望靈巖雲湖山澹蒼翠

杳杳循修塗依依踐叢薄遠水明橫橋疎林翳高閣相於素心人琴樽此棲託

歸鳥趨寒林夕陽下高樹捲茲邱中緣幽尋共微步日暮聞疎鐘迢迢出烟霧

空廊寂無人入夜轉幽獨寒飈激長松清露滴疎竹幾曲花溪深澄波漾微綠

白雲靜遙天明月出高嶺蕭蕭梅花林寒香散幽迥忽憶盤螭山前溪放煙艇

題予存吉人企晉所畫冊

石磴繞寒雲
茆齋依宿莽
古逕杳無人
寂歷秋泉響
香茆竹外亭
秋草松間路
想見尋幽人
閒曳孤筇去
落葉被重崖
飛泉赴空谷
烟際夕陽明
疎林見茆屋
曲澗爭流寒
瀑平林怒捲
長風安得龍
鱗石上焚香
靜理枯桐

石逕荒寒碧
蘚斑蕭蕭叢
竹翳柴關有
人草閣疎窗
裏閑對溪南
一棧山

自橫塘泛舟至木瀆登靈巖還宿企晉青瑤池館晨
與企晉適庭斗初來殷暨張布衣崑南崗過上沙水
木明瑟園抵天平入龍門歷法華洞諸勝

弭櫂遵山行
倚杖舉宿莽
蒼翠散寒空
步步愜心賞
漸進塗轉紆
升高勢益敞
枯木含華滋
喬松激清響
頽首矚具區
煙

水互滌決幽境非淺涉靈蹤發深想會物感自今弔古悼已往招提雲中開孤遊緬疇曩眷言來卜居繕性脫塵鞅

空山生暝色喬柯曖微暎揚舲迴北渚望見煙中村靡迤雲木暗晚藹桑昧繁吾友解簪紱居此辭塵喧睽孤意久索嘉會情彌敦矧有良知輩古義來同論明星照榆柳華月升前軒置酒布瑤席振衣登邱園夜寂發澹慮景曠安營魂思劬羊求蹤抱樸棲衡門

晨起天宇曠朝曦麗東隅同人陶嘉月縱棹尋椒塗桑葭被

新術叢條藏精廬先民鰲咏地

朱竹垞先生有水木明瑟圖賦

水木森縈紆

沿溪抗高館對嶺疏幽居初入尙荒藹稍行遂清虛薄雲送飛翼棲川緬鯨魚師彼濠上意卽事良多娛

吳山恒逶迤天平殊竦峭陽崖豁厓巖陰洞森竄窅嶺岬駭

鬼工歆仄見天巧羣峯麗近翫廣澤延遠眺覽奇意無歉歷
險境逾妙遂協謝客懷擬發阮生嘯叢篁起層巒喬林澹頽
照綠塗謝振策映泣理歸櫂逝將期重游永獲仁者樂

題鄭上舍迂谷

廷賜乘槎圖

祝融應節揚蒸歆火雲赤日連昏朝蕭齋無事蹋壁卧每思
決起衝風颶忽聞打門送急遞開緘彷彿生波濤龍門西去
望不極長空一氣連魁杓大章豎亥昔未步莫向星宿探支
條枯槎斑斑積古色但記七日乘靈潮何人振衣獨危坐竟
想絕域恣遊遨馮夷擊鼓倏隱現鯨魚跋浪紛周遭牽牛河
鼓若可卽俯仰恍忽凌層霄我聞大行昔奉使西域大夏驅
星輅出驍出冉極寥沆苴枝蒟醬來迢遙蠻君番長受約束
坐令東面歸王朝黃姑機邊一片石幾曾銀漢尋星橋流傳

錯誤不足數要在功業垂岩巖今君慨慷負偉略常笑搶地
同鷁鷁桑弧蓬矢有素志時倩好手圖生綃他年乘時持玉
節馳驅萬里誇人豪題詩落筆一長喟涼風颯颯來林梢

過惠山不及游晚至芙蓉湖泊

風利不得泊言經西神山山當具區背雲水縈煙鬢此區洵
清遠世亦出世間朗人每輩出友石懷孟端竹爐圖畫古自
寫松濤寒迄今翫遺製赤埴雕琅玕昔賢尚幽閑吾道宜淒
酸嘉游惜未遂蛾緣何由餐頗聞泉第二小杓分龍團茶熟
風亦定月上芙蓉灣

秦淮感舊示嚴秀才東有

長明

頻年閑訪秣陵秋南部繁華感舊游銀葉香銷天似水棗花
簾捲月如鉤板橋往事思沙嫩畫閣新聲記石州惆悵六朝

殘夢在藥爐經卷伴牢愁

潮落秦淮起暮颿斷蛩新鴈薄寒時玉箏誰勸花前酒金縷
空留壁上詞渺渺煙波桃葉渡依依風露小姑祠江關憔悴
無人省只有傷心小庾知

秦淮別凌祖錫張策時趙升之

長颿送烟帆忽屈金陵道正值素心人蘭言展幽抱水閣擁
匡牀梧陰趁夕涼風華江左舊珠樹粲成行聽罷三臺曲芳
樽湛寒淥劇飲醉何辭歡言意未足冉冉月初圓清燈照別
筵來朝聞欵乃各上渡江船三君鸞鶴姿夙著春申浦世譽
儼羊何詞章動吳楚黯黯惜同羣天涯袂又分幾時還聽雨
浹月憶論文求名非所知學道期相共歸路向邱樊笙壠足
吟諷寥落白門秋溪山感勝游相思如命駕好放剡溪舟

天發神識碑

在江寧縣學

煌煌禮樂地赫赫金絲堂東偏聳高閣數仞連宮牆其中貯寶刻創薤生精光云是吳天璽勒石垂高岡歲久裂爲三剝蝕難成行齧缺卧草莽牴觸來牛羊越時千百載乃得歸曹倉珍奇神鬼護輾轉依膠庠晶瑩蒼且潤體質堅而剛剗苔抉塵土筆勢分低昂或如二曜麗或如五緯彰虹霓鬬綯采雷電爭礮礮鯨鰲躍巨渤騏驥騰康莊軒軒鸞鳳翥宛宛蛟螭翔倚天長劍拄射日雕弓強五重錯錦繡兩邸侔珪璋遺瀛變籀篆俗體陋鍾王自從保氏後六書久微茫盤扞暨蚪蚪爰歷兼凡將失傳至秦漢惟此稍頡頏自當與球圖藝苑傳琳琅維時東吳末驕主行荒亡扶輿示警戒厥咎呈機祥玉函發神識矯詐詎可詳蘭臺與東觀相繼摘鴻章誰知削

木梯風浪浮龍驤黃旗語終驗青蓋歸洛陽禎符豈足信妙蹟焉能忘摩挲逮曛黑欲去心旁皇

樊秀才

明徵

贈瘞鶴銘

樊君嗜古如歐趙示我碑文出江微掛壁猶疑波浪奔入函更覺風煙繞此碑舊刻在山巖何時淪陷歸深奧水落常看獼狢游潮生屢值蛟龍嘯豈期五石出崇淵寶刻重教瞻墨妙滄洲使君旣好事紀元退谷精讐校自來比擬換鵝經不識仙蹤更清峭通明當日住三茅華陽真逸傳真誥玉柱金廷自昔聞洞天福地疇能到重重樓閣仰巍峩謾謾松風動竊祿空中鸞鳳尙時聞華亭靈羽何須召綈衣硃頂上圓壇警露餐風伴高蹈清唳時聞出九皋招魂自遠歸三詔丹陽仙尉亦臨連江陰真宰俱傷悼摩崖奇蹟記千秋直向山陰

伴逸少後來聚訟互評量魯望逋翁焉足道太息松寥我未
經與君何日攜單襪摩挲殘碣發幽光並望胎禽游海嶠

青溪夜泊寄朱肱徵

今夜秦淮宿娟娟玉露秋風生桃葉渡夢遶荻花洲舊宅思
江令新詞唱莫愁惟聞一片水鳴咽向東流

畫舫青溪渡迴牆白下城西風楊柳岸搖落倍含情水調三
更遠銀河永夜清曉寒間斷鴈淒怨又南征

遠道傷漂泊佳期感滯淫風花吳苑地悵望每沾襟蘅杜逢
秋晚煙波入夜深更愁東去路殘葉滿楓林

泊北固山下入甘露寺訪六朝諸遺蹟

一試乳井泉再啜新豐酒秋風向晚寒瑟瑟凋煙柳江山合
雄俊勝槩數京口蕭郎昔北顧嘉稱被陵阜何時壽邱荒空

見很石醜飛揚蓋世才寂寞千載後玉蕊亭亦蕪崖州但回首
甘露獨歸然僧伽傳最久落照下長波紫翠無不有樓臺
儼畫圖形勢抱跟肘海月猶未生奔濤激林鼓

京口寄江秀才賓谷

見

及其弟于九

惻

明月照江水笛聲江上樓西風吹落木一夜送行舟我欲舉
芳杜因之寄昔遊隋堤秋色遠相望不勝愁

夜泊丹陽

權歌人語共淒清又聽江鴻第幾聲寒月如霜霜似雪雲陽
驛外夜三更

香水溪邊別舊遊二分明月夢揚州舵樓橫笛誰同聽只有
寒燈伴客愁

自京口放船至揚州

玉帶山門路扁舟幾度來依然聞放梵縹緲出香臺
雲樹西津渡樓臺北固山江帆斜照裏相送度邗關
綠檻煙中艇青帘水上樓夜深聞玉笛涼月滿寒流

舟中曉雪懷張崑南

晨起聞巖風孤篷灑殘雪茆屋炊煙稀古逕入蹤滅初日曉
更陰層冰散還結稍聞寒禽啼或恐孤松折川塗曠無垠平
蕪但蕭屑忽憶素心人清吟對林樾彈琴慕古歡掩關事禪
悅蕭然委巷中渺與人世絕迢迢千里餘相思值窮節良晤
日已疏遠問何由達緬懷林下居惆悵天涯別

古仙女廟

殘雪迴塘夕照遲明珠翠羽儼空祠蕙香幃卷爐煙歇時有
靈風颭畫旗

訪水繪園故址

何人置酒更逢迎勝地猶聞重雉城
敗舫久無賓客坐荒畦
尙付子孫耕簾前董宛曾題畫花下雲
郎記合笙吟罷迎陵
腸斷句亂鴉殘照不勝情

田家夜宿

疎煙起茆茨朔吹動林麓飛禽相與還
行人計棲宿蒼蒼夕
靄中一逕入喬木農家農事閒留賓解
款曲虛牖隱荒榛頽
垣翳苦竹夜深寂無人寒燈照深屋卽
次幸已安稅駕何時
卜歲晏思故居悵然感幽獨

曉發

卧聽嚴更盡推篷問去程江波寒自湧
海月曉還明雪霽瓜
州渡雲迷鐵甕城中流聞旅鴈浩蕩感
浮生

晚泊澄江

苦竹黃蘆晚泊船江湖歲暮自蕭然寒潮渺渺來千里芳序
駸駸又一年村舍參差殘雪地煙嵐層疊夕陽天回思西蠡
湖邊路曾試岡頭第二泉

座主夢文子先生

麟

贈詩四章敬答

騶虞游郊藪五彩分丹黃鸞鳳棲阿閣六律諧宮商英賢出
間世天地增嘉祥公家由溟渤箕尾垂光芒簪纓傳累葉勛
業銘太常少時握彩筆高步登巖廊中州拔杞梓南海收圭
璋揭來持玉節星象臨文昌生平愧禱昧寧敢馳康莊豈期
國士遇親炙居門牆

天文賁人文山河分牛斗誰爲大雅宗宗伯實稱首

歸愚先生洪

鈞發鏘鳴磨歌著

朝右王

鳳鳴
皆錢曉

並師承吳

金來

曹沂先

後承蓋得趙

張策

摘辭瑰瓊玖黽文字交徵逐嚙杯酒

幸逢伯樂來空羣

別牝牡

數子皆雅才道藝各自負儻能拔

其尤風雲偕奔走握衣奉教思立言期不朽

梧桐生高嶺意在干青霄蘭蕙出遠浦花欲揚芳皋生年迫
壯盛當路誰能招何時出泥滓登席如瓊瑤玉衡忽南至長
養敷寒條微材被潤澤弱植歸甄陶惠以五言詩高唱絲風
騷書紳垂永矢歸去誇同袍

君山近東溟長江繞其足朔風一夜號飛雪皓巖麓寒士裘
蒙茸獨賴擁爐宿經帷矧可戀輕裝豈忍束公車戒嚴程驪
歌已迫促歸舍辭春萱羣賢互相逐盈盈酒一罇隱隱帆半
幅欲行未曾行攬袂淚頻續科名詎可期道義奉所勗永佩

金玉音征塗日三復

原作

蒙古夢 麟文子

璚葩麗雕榭春機扇崇蘭美人衽服坐瑤瑟聊獨彈朱絃
靜理蘊遠調清徽完音希闕古意闔戶資幽歡殊響繁夜
叢泠泠曲就殘綜往兼慮來引領起微歎願折珊瑚枝持
謝知音難

之子亦何好窈窕光容儀落葉朝翩翩手持瓊樹枝翠瑤
飾珠珮翔步臨前墀噓蘭拭洞簫不惜勞空閨明月來廣
除曲斷無人吹含睇稍延佇我願神爲移曲調寧不嘉白
日方西馳努力愛景光崇德爲子期

暄風被陽林巖構榮丹葩蘭芷及荃蕙郁郁回春華輕颺
發芳豔孤秀凌朱霞太古忽已遙入耳皆淫哇不悲元音
遠坐患流無涯斯人詣淳古指摘勞相加願製芰荷衣怡

子以清嘉

謂鳳階企
眉諸子

元音逝已久瓦缶空陳陳哀哉枯桐枝俯首同殘薪大雅
出晚世古意陶天真靜參淳悶趣援手扶奔輪沈光祕元
訣和性噓芳春斯人亦已然此曲何難申咫尺獨緘憶悵
望勞嘉辰

謂沈
宗伯

春融堂集卷四終